

Am Weihnachtsbaum die Lichter brennen ...

Die Paula hott omm Telefon verzählt: Gestern moie habb ich die elektrisch Beleuchtung ferr de Christboom vom Speicher gehollt. Mir probiern die erst emol, bevor merr die onn de Boom mache, hott moin Karl gesaat. Also hawwe merr die Lichterkett uff de Boddem geleet, de Stecker in die Steckdos gesteckt – unn wirklich, mindesdens zwonsisch Berncher hawwe nit gebrennt. Weil mir jed Jahr dess selwe Theater hawwe unn schunn e gonz Dutt voll Ersatzberncher hawwe, von dene koons mehr basse dut, weils jed Jahr Berncher mett onnern Steckverbindunge gewwe dut, hawwe merr die Kett zesommegemacht unn hawwe se widder uff de Speicher gebrocht zu dene onnern Kette, die all de selwe Fehler hawwe unn noch nit fortgeschmisse worrn sinn.

Karl, habb ich gesaat, mir mache widder emol richdische Kerze uff de Boom, odder?

Nix, hott de Karl gesaat, mir hawwe koo Kerzehalter mehr unn alls mussde owacht basse dass de Boom nit brennt, mir fahrn unn holle uns e nei Lichterkett.

Also sinn merr los, e nei Kett kaafe. Awwer de erst hott de Karl dess Kästche uffgemacht, hott de Stecker erausgezooche unn in die nächst Steckdos gesteckt unn guck, alle Berncher hawwe gebrennt. Mir wollte aach e paar Ersatzberncher mett numme, awwer doo gabs so vill verschiedene, mir wusste garnit, was ferr die richdische sinn, also hawwe merr gelosse.

Kaum dehoom, hawwe merr die Kett ausgepackt, hawwe se uff de Boddem geleecht unn aach doo hawwe alle Berncher gebrennt. Jetzt konnde merr die Kett onn de Boom mache, hawwe geguckt dass alle Berncher schee iwwer de Boom verteilt warn unn hawwe zuletzt de Stecker in so e abschaltbar Steckdos gesteckt unn widder hawwe alle Lichter gebrennt. Mir warn zefridde unn de Karl hott die Steckdos abgeschalt.

E bissi später iss de Karl von de Kautsch uffgestonne unn hott den Schalter von dere Steckdos erunnergedrickt, doo sinn die Lichter oogonge unn dess hott schee ausgeseh.

Nor de Karl iss vor dem Boom stieh gebliwwe unn hott alls geguckt.

Ei Karl, frooch iss, was hosde dann, kumm, setz dich widder, mir mache mol de Fernseher oo.

De Karl hott alls weider geguckt unn dann geknorr: Zwaa von dene Berncher brenne nit.

No ja, saach ich, Hauptsach die meisde brenne, komm setz dich.

De Karl hott de Kopp geschittelt. Naa, jetz muss ich doch noch emol fahrn unn Ersatzberncher holle, weil wenn oons von dene nit brenne dut, kriehn die onnern zu vill Strom unn brenne oons nooch emm onnern dorsch. Unn dann isser mett so emm kaputtene Bernche los gefahrn unn iss unn iss nit hoomkumme. Unn alser dann kumme iss, hatter fuffzeh Kerzehalter unn dreißisch Christboomkerze mettgebrocht.

Ich habben oogeguckt. Karl, dess hosde richdisch gemacht, weil erstens dun merr mett dene Kerze Strom sparn unn zweidens gieht nix iwwer e Kerzelicht.

Jetzt werr nit romantisch, hott de Karl gesaat unn ich druff: Karl, waaßde noch wie merr grad verheirat warn? Doo hawwe aach die Kerze omm Christboom so schee gebrennt.

De Karl hott mich in de Arm genumme unn mich gedrickt: Unn mir hawwe zwaamol nit uffgebasst: De Christboom hott oogefonge ze brenne unn e Dreiverrdeljohr später iss unsern Bub uff die Welt kumme.